


四明叢書

張宗祥



安晚堂集

四明張氏約園開雕

安晚堂詩集序

余曩讀安晚集因頗究其立身行事本末宋史極稱之至有小元祐之目甚矣阿私之爲害後世史筆之難信也當宋之世其苦外患久矣僥倖而有偏安之局亦久而後亡耳故卒與外患相終始是猶久病孱弱之軀將養之不及外邪時復侵之遂漸入於膏肓矣試觀寧理之世尙成何國家又奚論寧理以後種孽芽於數百年之前一旦潰壞於今日今之枋國者乃不幸而代前人盡受其過此余于安晚猶有可原書板幾燬勿復存

者也近復取其詩讀之頗怪漁洋竟施多禪語之論或
又謂其近似香山其實皆未有得於安晚也夫詩之爲
學虞書十二言盡之矣然在後世久已析爲二派顧讀
其人之詩卽其人之志行十可八九得則不誣也漁洋
推近世詩宗然其工力悉耗在詞中依永和聲黍米不
失卽其思與志終不能不爲所屈矣夫僅託於言志固
往往失其爲詩徒耗工力於詞中卽亦失其所以爲詩
之誼然則如漁洋者其弗能有得於安晚之詩也固宜
至如香山其與安晚亦爲異曲所遭之時與地固弗同

也雖然安晚亦嘗耗其工力於詞中焉今其詩猶有約
略可窺見者徒以雅意蘊藉務使人以難窺卽其立身
行事亦多用此術觀其相業可知焉已今校其詩刊之
并揭發其心志之可窺稍論著之俾後之人有攷焉民
國二十六年十月後學張壽鏞序

四庫全書提要

安晚堂詩集七卷

宋鄭清之撰清之初名燮字文叔後改今名字德源安晚其別號也鄞縣人嘉定四年進士寶慶初以定策功累官太傅左丞相卒諡忠定事蹟具宋史本傳所撰安晚集本六十卷宋時刊於臨安此本所存僅第六卷至第十二卷但有詩而無文較原目僅十之一考王士禛蠡尾集有安晚集跋亦稱僅古今體詩第六卷至第十二卷則康熙中已無完本矣士禛但謂其詩多禪語而

不言其工拙今觀所作大都直抒性情於白居易爲近
其咏梅咏雪七言歌行二十首亦頗有可觀且清之爲
相擢用正人時有小元祐之號在南宋中葉猶屬良臣
不但其詩爲足重固不容以殘闕廢也厲鶚宋詩紀事
從臨安四明兩志採得淨明院及題雪竇妙高峯詩二
首爲此本所未載零篇斷簡幸留百一今亦併附入焉

安晚堂詩集卷首

宋史本傳

鄭清之字德源慶元之鄞人初名燮字文叔少從樓昉

學能文樓鑰亟加稱賞嘉泰二年入太學

案脫嘉定二字

十年

登進士第調峽州教授帥趙方嚴重靳許可清之往白

事爲置酒命其子范葵出拜方掖清之無答拜且曰他

日願以二子相累湖北茶商羣聚暴橫清之白總領何

炳曰此輩精悍宜籍爲兵緩急可用炳亟下召募之令

趨者雲集號曰茶商軍後多賴其用調湖廣總所準備

差遣國子監書庫官十六年遷國子學錄丞相史彌遠
與清之謀廢濟國公事見皇子竝傳俄以清之兼魏惠
憲王府教授遷宗學諭遷太學博士皆仍兼教授寧宗
崩丞相入定策詔旨皆清之所定理宗卽帝位授諸王
宮大小學教授遷宗學博士宗正寺丞兼權工部郎兼
崇政殿說書帝問外人因閤子庫進絲履有謗議清之
言禁中服用頗事新潔者帝曰故事月進鞵數兩朕非
敝不易何由致謗清之奏孝宗繼高宗故儉德易章陛
下繼寧考故儉德難著寧考自奉如寒士衣領重澣革

爲屢補今欲儉德著聞須過於寧考方可帝嘉納寶慶
元年改兼兵部兼國史院編修官實錄院檢討官遷起
居郎仍兼史官說書樞密院編修官二年權工部侍郎
暫權給事中進給事中升兼同修國史實錄院同修撰
紹定元年遷翰林學士知制誥兼侍讀升兼修國史實
錄院修撰端明殿學士簽書樞密院事三年授參知政
事兼簽書樞密院事四年兼同知樞密院事六年彌遠
卒命清之爲右丞相兼樞密使端平元年上旣親總庶
政赫然獨斷而清之亦慨然以天下爲己任召還眞德

秀魏了翁崔與之李真徐僑趙汝談尤焞游似洪咨夔
王遂李宗勉杜範徐清叟袁甫李韶時號小元祐大者
相繼爲宰輔惟與之終始辭不至遺逸如劉宰趙蕃皆
見旌異是時金雖亡而入洛之師大潰一年上疏乞罷
不可拜特進左丞相兼樞密使三年八月霖雨大風四
疏勾去九月禋祀雷變請益力乃授觀文殿大學士醴
泉觀使兼侍讀四疏控辭依舊大學士提舉洞霄宮及
聞邊警密疏恐陛下憂悔大過以汨清明之躬累剛大
之志嘉熙二年封申國公四年遣中使賜御書輔德明

謨之闢賜楮十萬緡爲築室乃日與賓客門生相羊山水間淳祐四年依前觀文殿大學士醴泉觀使兼侍讀屢辭不允拜少保觀文殿大學士醴泉觀使兼侍讀進封衛國公趣入見有旨賜第五年正月上壽畢亦疏乞歸不允拜少傅依前觀文殿大學士醴泉觀使兼侍讀進封越國公居無何喪其子士昌決意東還又不許拜少師奉國軍節度使依前醴泉觀使兼侍讀越國公賜玉帶更賜第于西湖之漁莊進讀仁皇訓典謂仁祖之仁厚發爲英明故能修明紀綱而無寬弛不振之患孝

宗之英明本於仁厚故能涵養士氣而無矯勵峭刻之習蓋仁厚英明二者相須此仁祖孝宗所以爲盛也帝褒諭之六年拜太保力辭故事許回授子孫清之請追封高祖洽帝從之蓋異恩也七年拜太傅右丞相兼樞密使越國公中使及門清之方放浪湖山寓僧刹竟夕不歸詰旦內引叩頭辭免帝勉諭有外間所不及知者甫退則中使接踵而至或請更化改元清之曰改元天子之始事更化朝廷之大端漢事已非古然不因易相而爲之帝以邊事爲憂詔趙葵以樞使視師陳韓以知

樞密院事帥湖廣二人方辭遜會清之再相力主之科
降辟置無所留難葵韓遂往於是戰于泗水渦口木庫
皆以捷聞九年拜太師左丞相兼樞密使辭太師不拜
依前太傅每謂天下之財困於養兵兵費困於生券思
所以變通之遇調戍防邊命樞屬量遠近以便其道塗
時緩急以次其遣發又議移歲調兵屯以成淮面併軍
分頭目以節廩稍先移鎮江策勝一軍屯泗水公私便
之諸路虧鹽執其事者破家以償清之覈其犯科者追
理望誤者悉蠲之全活甚衆沿江算舟之賦素重清之

次第停罷如池之雁汭有大法場之目其錢分隸諸司
清之奏罷其竝緣漁取者蓋數倍公家之入合分隸者
從朝廷償之報下清之方與客飲舉杯曰今日飲此酒
殊快四上謝事之章十年進十龜元吉箴一持敬二典
學三崇儉四力行五能定六明善七謹微八察言九惜
時十務實疏奏敬天之怒易敬天之休難天怒可憂而
以爲易天休可喜而以爲難何哉蓋憂則懼心生懼則
怒可轉而爲休喜則玩心生玩則休或轉而爲怒帝大
喜命史官書之賜詔獎諭十一年十疏乞罷政皆不許

拜太師力辭有事于明堂有旨閤門給扶掖二人再賜
玉帶令服以朝十一月丁酉退朝感寒疾危甚猶以未
得雪爲憂俄大雪起曰百官賀雪上必甚喜命擲雪牀
前觀之累奏乞罷政不允奏不已拜太傅保寧軍節度
使充醴泉觀使進封齊國公致仕卒遺表聞帝震悼輟
朝三日特贈尚書令追封魏郡王賜諡忠定清之不好
立異湯巾嘗論事侵清之及清之再相巾求去清之曰
己欲作君子使誰爲小人力挽留之徐清叟嘗論列清
之乃引之共政趙葵視師年餘乞罷上未有以處之清